



De Fuhrmann.

Ach, so e Fuhrmann hatt's doch gut:
Er werd de ganze Dag gefahr,
Seiⁿ Bäⁿ sinn immer ausgeruht
Un alles, waß er dreibt un dhut,
Iß nix wie Hüh un Hott un Har

Morjens in aller Herrgottsfrieh
Zieht er seiⁿ Geilche auß'em Schtall;
Dann gehts mit lautem Hott un Hüh
Naus zu de Schtadt in Wald un Grie,
Mit Singe un mit Gäscheßknall.

Werdd in die Schtubb net eiⁿgeschberrt
Un braucht net in die Schul se gehⁿ,
Dann wie de Waache aⁿgescherrt
Un wie de Gaul behannelt werdd,
Deß iß seiⁿ ganzes A B C.

Esse un Drinke hatt käⁿ Not;
Un ah de richtge Abbedit.
E Fuhrmann un e Reesebrot
E Halwer Weiⁿ, Schockschwerenot!
Die bleiwen dr net lang zu dritt.

Un Dwends dann in Hei un Schtroh,
Bei Wind un Wetter unner Dach,
Bei seine Geil, wie ruht sichs do
Im warme Schtall so guschlich froh,
Bis frieh die Hinkel wirrer wach!

Un kummt er in die Ziehung dann,
Hatt Schanse er beim Milidär;
Wer reite un wer fahre kann,
Bringts bis zum General. Ach wann
Ich aah doch so e Fuhrmann wär!

